


EDITORIAL

Pabaskugon ang pagbato sa ginpasingki nga pagpasilabot militar kag pagpanghangkat sang gyera sang imperyalismong US

Sa masunod nga mga semana kag bulan, sigurado nga paga-atubangon sang pumuluyong Pilipino ang ilabi kalubha nga pagpasilabot militar sang imperyalismong US kag mga kaalyado sini nga pungsod sa Pilipinas sa pagpanghangkat sang gyera sa China. Indi malayo nga magpadulong sa armado nga komprontasyon ang opensiba nga mga aksyon sang US kag mga aliyado sini kontra China sa sulod sang subong nga tuig, ilabi nga desperado nga nagapasikat si Presidente Biden sang US sa eleksyon didto sa Nobyembre.

Ginagatungan sang US ang tensyon militar sa gintalana sini nga first island chain nga nagasakop sa mga pungsod kag isla para palibutan ang China (halin Kuril Islands, Japan, Ryukyu Islands, Taiwan, naaminhan kag natundan sang Pilipinas kag Borneo). Ilabi nga ginapainit sang US ang sitwasyon sa natalana nga pagpahulag sa 11,000 ka tropang Amerikano sa Balikatan 2024 (Abril 22 tubtob May 10) kag ang hamulag pa nga wargames nga Cope Thunder halin Abril 8 tubtob 19.

Bag-o sini, asud-asod ang pag-abot kag pagpakigsinapol sang mga yabe nga upisyal militar kag pangseguridad sang US, kabahin si State Sec. Anthony Blinken, kay Ferdinand Marcos Jr kag sa AFP. Gintuon ang mga sinapol sa panahon nga taas ang sentimyento batuk sa isa naman



ka pagpamomba sang tubig nga ginlunsar sang China batuk sa "supply mission" sang Coast Guard sa Ayungin Shoal. Ang mga "supply mission" nga ini ang kabahin sang mga taktika nga direkta kag patago nga ginasulsolan sang US para hagtaton ang "gray tactics" (mga agresibo nga aksyon nga indi armado) sang China kag iduso ini nga direkta nga maggamit sang armado nga aksyon.

Akig ang pumuluyong Pilipino sa mga agresibo nga aksyon sang China batuk sa barko kag mga mangingisda nga Pilipino. Apang sa baylo

nga iduso ang nagkalain-lain nga porma sang pagresolba sini sa malinong nga pamaagi, ginhingalitan sang US ang sitwasyon agud manghilabot kag padakuon ang presensya sang militar sini sa pungsod. Ginagamit man ini sang US para hatagan rason ang armado nga aksyon sini sa idalom sang Mutual Defense Treaty (MDT), sa katuyuan nga gatungan kag pa-ibwalon ang gyera sa rehiyon sang Asia-Pacific sa indi malayo nga palaabuton. Sa tulod sang US, gindeklarar kasan-o lang ni Marcos nga "desaysibo nga pagasabton" sang Pilipinas ang pagpang-

ipit sang China, kaakbay ang "katimbang, abyan kag kaalyado" sini nga US.

Patimaan sang tuyo sang US sang pagpaarangka sang pagpanulsol sang gyera ang panibag-o nga "dedlayn" sang AFP nga dugmukon na sini ang tanan nga larangan gerilya sadtong Marso 31, ubuson ang tanan nga pang-away nga yunit sang BHB bag-o ang katapusan sang Hunyo, kag tanan nga panrehiyon nga komite sang PKP kag kumand sang BHB bag-o ang katapusan sang tuig. Ang pila ka sulit na man nga gindeklarar ni Marcos nga gusto niya makita ang AFP nga nakatutok sa "external defense" ang sandig sa handum sang US nga lubos nga magamit ang AFP sa mga plano sini sa pagpangaman kag pagpanghagyat sang gyera kontra sa China. Para diri, handa si Marcos nga maggasto sang binilyon ka pondo sang pumuluyo para baklon ang usado nga mga armas nga ginabaligya sang US kag mga alyado sini sa AFP.

Sa atubang sang dako nga pamahog sang pagbaskog sang pagpasilabot militar sang US, kinahanglan nga ubos-kusog nga ibuylo ang malapad nga kahublagan anti-imperyalista sa mga maga-abot nga semana kag bulan. Dapat tayuyon ang kam-

panya kag pagbato sa pagpasilabot militar sang US, indi lang sa panahon sang Balikatan, kundi sa bilog nga tuig.

Gilayon nga iduso ang plano para sa malaparan nga kampanyang edukasyon sa kabukiran kag mga syudad. Hiwaton ang mga pagtilipon kag malaparan nga mga pagtuon. Maukod nga ibuyagyag ang pagpanulsol sang gyera sang US kag pagmanipula sini sa mga sentimiyento sang mga Pilipino batuk sa China, kag ang matuod nga tuyo sini nga makaplastar ini sang mga tropa kag armas sa pungsod, kag makabaligya sang mas madamo nga armas sa Pilipinas kag kasikbit nga mga pungsod. Pareho sa nagakahitabo nga proxy war sini sa Ukraine, kag henosidyo sini sa Palestine katimbang ang Zionista nga rehimen sa Israel, dako ang pagakitaon sang mga Amerikano nga mga kumpanya sa armas kung magasaglab ang rehiyunal nga gyera sa Asia-Pacific.



Pahulagon ang bug-os nga pumuluyo agud pangapinan ang kaluwasan sang Pilipinas sa atubang sang pagpanghangkat sang US sang inaway sa China. Indi pag tugutan nga masulit ang kahalitan kag kapait nga naagum sang magbunguanay sa pungsod ang imperyalistang US

kag Japan sadtong Ikaduha nga Gyera Pangkalibutanon. Isahon ang tanan nga demokratikong pwersa para batuan ang pagpasilabot-militar sang US kag iduso ang pagbungkag sa mga base kag pasilidad sini sa kadutaan kag kadagatan sang Pilipinas. Kadungan sini, iduso sa China nga maghalin sa mga soberano nga teritoryo sang Pilipinas kag untaton ang pagpang-ipit sini sa mga mangingisda sa kaugalingon naton nga palangisdaan. Pareho nga ition sa China kag US ang panawagan nga maglayas kag untaton ang militarisasyon sa West Philippine Sea, samtang ginahatagan tum-ok ang pagbuyagyag kag pagsaway sa ilabi ka mas dalagko kag agresibo nga presensya sang US sa kadagatan kag kadutaan sang Pilipinas, kag sa direkta nga pagpanghangkat sini sang gyera.

Ipasanyog ang mga akrimen sang US sa pungsod sa masobra isa ka siglo nga sini nga paghari-harian kag pagpangawat sa Pilipinas. Ibuyagyag ang mga paglapas sa tawhanon nga kinamatarung, pagpamomba kag iban pa nga pagpang-abuso sang ginpabaskog nga kampanya sang pagpanumpo sa kabukiran sang ginapondohan, ginahanas kag ginaarmasan sini nga AFP.

Sistematiko nga lab-uton, organisahon kag pahulagon ang nagadako nga isip sang pumuluyo batuk sa Balikatan, nagalala nga pagpasilabot sang US, kag pagpanghangkat sang inaway. Kasugpon sang pagbato sang pumuluyo kontra "chacha" kag kinamatarung, ang pagbato nga ini ang mas magapabaskog kag magapapagsik sa pungsodnon-demokratiko nga kahublagan masa.

Determinado naman ang BHB nga magpabaskog kag ilunsar ang nagadamo nga mga taktikal nga opensiba, nga krusyal nga sangkap para pungan ang iskema sang US nga pasaglabon ang inter-imperyalista nga inaway. Pabaskugon ang rekrutment sang BHB kag tipunon ang malapad nga suporta sang patriyotiko nga kahublagan para sa rebolusyonaryong armadong paghimakas.

 <p>Tuig LV No. 7 Abril 7, 2024</p> <hr/> <p>Ang Ang Bayan ginabantala sa lenggwahe nga Pilipino, Bisaya, Iloco, Hiligaynon, Waray, Ingles kag Espanyol. Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p>	<h2 style="text-decoration: underline;">Kaundan</h2> <p>Editorial: Pabaskugon ang pagbato sa nagingki nga pagpasilabot militar kag pagpanghangkat sang gyera sang imperyalistang US 1</p> <p>Ika-55 nga anibersaryo sang BHB, ginsaulog 3</p> <p>Rebolusyonaryong kahiwatan sa ICR 3</p> <p>Kumperensya angot sa imperyalismo, ginlunsar 4</p> <p>85th IB, gin-ambus sang BHB-Quezon 4</p> <p>Kalbaryo sang Masang Anakbalhas, ginpatigayon 5</p> <p>Pagtahod sa IHL, maukod nga ginpakigbato 5</p> <p>Mga protesta 5</p> <p>Kahublagan panadlong sa Agusan kag Surigao 6</p> <p>Sa malip-ot nga pulong 7</p> <p>Pagpamomba, pagpatay, kapintas sang AFP 8</p> <p>2 ka gin-abdak nga aktibista, ginpakita na 8</p> <p>"Kwarantina" militar 9</p> <p>Protesta batuk sa liberalisasyon sa India 10</p>
<p>Ang Ang Bayan ginabantala duha ka beses kada bulan sang Komite Sentral sang Partido Komunista ng Pilipinas</p>	
<p style="text-align: center;"> ang.bayan@cpp.ph</p>	

Ika-55 nga anibersaryo sang BHB, ginsaulog

Nagahiliugyon sa ispiritu, nakasira ang kinumo nga ginsaulog sang mga kadre kag katapo sang Partido Komunista ng Pilipinas, mga hangaway kag kumander sang Bagong Hukbong Bayan (BHB), sang mga alyado nga organisasyon sang National Democratic Front of the Philippines (NDFP) kag sang rebolusyonaryong masa ang ika-55 nga anibersaryo sang BHB sadtong Marso 29.



Kadungan sang anibersaryo, nagpanawagan ang Komite Sentral sang pagbalik-tan-aw sa mga naangkon sang hangaway sang banwa kag mga kakulangan sa nagligad nga tuig, pagkuha sang mga leksyon halin sa mga ini, kag pagdihon sang plano para labuton ang mas dalagko nga kadalagan sa pagsulong sang rebolusyonaryong armadong paghimakas sa palaabuton nga tuig.

Malipayon man nga ginpalab-ot sang Komite Sentral nga ang panawagan para sa kahublagan panadlong nga ginbantala sang Partido sadtong nagligad nga Disyembre 2023 ang bug-os tagipusuon nga ginhakos sang tanan nga panrehiyon nga komite sang Partido kag kumand sang BHB. "Positibo ang ila nangin sabat kag nagapatigayon subong sang mga kumperensya sang pagsumada kag mga sinapol pagtuon agud tumuron ang mga pagsayop kag kakulangan agud tadlungon ang mga ini, kag pag-on kag kumprehensibo nga isulong ang tanan nga rebolusyonaryong katungdanan," base sa Komite Sentral.

Gintahasan man sang pamunuan sang Partido ang BHB nga maglunsar sang mga sandigan nga taktikal nga opensiba nga masarangan daugon, nga nagapahuyang sang kaaway paagi sa bahin-bahin nga pagpatay sa iya armado nga pwersa, kag pagkuha sang mga armas sini. "Ginapataas naton ang ikasarang sang BHB sa pakig-away paagi sa inaway," pahayag pa sini.

Mga kahiwatan kag aktibidad

Sugod tunga-tunga sang Marso, ginlunsar sa mga larangan gerilya kag

syudad, halin Luzon tubtob Mindanao ang mga likom nga pagtilipon para sa anibersaryo sang hangaway sang banwa.

Sadtong Marso 25, naglunsar sang rali-pakilat sa Recto Avenue, Manila ang nagkalain-lain nga rebolusyonaryong organisasyon sa National Capital Region (NCR) para pasidunggan ang BHB. Ginpangunahan ang hublag sang NDF-NCR nga gintambungan nagapanguna sang mga katapo sang Kabataang Makabayan (KM) kag Artista at Manunulat ng Sambayanan (Armas). Sa ila, dapat ipakita kag pasidunggan sa tagsa ka pamusod sang rehiyon ang armadong pagbato isip nagapanguna nga porma sang paghimakas kag ipahakos ini sa pumuluyo.

Sa Rizal, nanagtag sang polyeto ang mga katapo sang NDF-Rizal sa mga nagtambong kag nakig-isa sa tradisyunal nga Alay Lakad, nga ginupdan sang minilyon ka Katoliko, sa Antipolo City sadtong Marso 28. Pagkasunod adlaw, Marso 29, ginsab-it nila ang gin-andam nga obra nga balatengga sa matawo nga lugar sa banwa sang Taytay.

Ginpangunahan naman sang mga sanga sang KM ag kahiwatan sa sulod sang mga nagapanguna nga unibersidad sa pungsod. Nagpinta sila sang mga panawagan kag nagpatapik sang mga poster sa Polytechnic University of the Philippines sa Sta. Mesa, Manila, University of the Philippines (UP)-Visayas sa Miag-ao, Iloilo, UP Los Baños, kag UP Cebu.

Naglunsar man sang oplan pinta

"Ika-55 nga..." sundan sa pahina 4

Rebolusyonaryo nga kahiwatan sa ICR

PUNO SANG REBOLUSYONARYO nga kapagsik kag kalipay nga naghiwat ang mga rebolusyonaryong pwersa kag masa sa adlaw sang ika-55 nga anibersaryo sang Bagong Hukbong Bayan (BHB) sa nagkalain lain nga bahin sang Ilocos kag Cordillera, kabahin sa mga syudad sang rehiyon. Sa kahiwatan, ginbasa kag gintalakay ang pahayag sang Komite Sentral sang Partido para sa ika-55 nga anibersaryo sang BHB. Ginsaludohan nila ang mga Pulang kumander kag hangaway sang BHB kag nagpasidungog sa kadungganon sang mga rebolusyonaryong martir.

Ginlunsar ang mga kahiwatan sa nagkalain lain nga pagtilipon pareho sang mga pagtuon sa Abante nga Kurso sang Partido kag Intermedya nga Kurso sang Partido sa ulihi nga semana sang Marso. Ginbuyok sa mga pagtilipon ang mga lamharon nga mga kadre nga ibubo ang panahon sa Pulang hangaway kag gamiton ang mga oportunidad agud makahibalo, maghanas kag mangin maayo nga hangaway sang banwa sa pulitika kag militar.

Ginhatagan sang kapagsik ang mga kahiwatan sang mga pangkultura nga pasundayag kasubong sang binalaybay, hulag-binalaybay kag ululupod nga pagkanta sang mga rebolusyonaryo nga kanta kag mga sinalu-salo.

Ang nasambit nga mga kahiwatan sa Ilocos-Cordillera ang tampa sa nawong sang Northern Luzon Command sang Armed Forces of the Philippines nga nagdeklarar nga dugmok na ang mga larangan gerilya kag rebolusyonaryo nga kahublagan sang rehiyon. Kasubong nga tanga ang mga pwersa sang militar kag pulis nga todo-alerto nga nagposte kag nanilag pa bisan sa mga syudad kag sentrong urban, nga sa punta sang ila ilong nakataas ang kinumo kag nagalanog ang mga panumpa sang mga rebolusyonaryong pwersa nga isulong ang inaway banwa sa ika-55 nga anibersaryo sang hangaway sang banwa.

Kumperensya sa teorya angot sa mga krisis sang imperyalistang ekonomya, ginlunsar

Madilag-on nga ginlunsar halin Marso 28 tubtob Marso 29 sa Amsterdam, the Netherlands, ang Internasyunal nga Kumperensya sa Teorya angot sa mga Krisis sang Imperyalistang Ekonomya. Gintambungan ini sang 98 ka delegado kag tiglawas halin sa mga grupo kag partido nga proletaryo, anti-imperyalista kag demokratiko halin sa 18 ka pungsod. Ikaduha nga kumperensya na ini nga ginpatigayon sang National Democratic Front of the Philippines (NDFP). Ginlunsar sadtong Oktobre 2023 ang una nga kumperensya nga bahin sa paglunsar sang inaway banwa.

Sandig sa pahibalo nga ginpagwa sang kumperensya, gintalakay sa 2-adlaw nga pagtililipon ang nagaluntad subong nga mga kinaiya kag padron sang mga krisis sa ekonomya sa idalom sang imperyalismo kag sa tunga sang nagasingki nga inter-imperyalista nga banggianay. Nangin tum-ok sa mga diskusyon ang 1) kapitalista nga sobrang produksyon; 2) mga oligarkiya sa pinansya kag mga inaway sa baligyaanay; kag 3) ang pangkalibutanon nga krisis tuga sang imperyalista nga kasakon kag paglagas sang supergiansya.

Isa sa nagapanguna nga nagpadayag sang panan-awan ang Partido Komunista sang Pilipinas nga nagsumite sang dokumento nga gintigulohan "Ipinakikita sang Imperyalistang mga Krisis na Hinog na ang Naghihingalong Sistema para sa Sosyalistang Rebolusyon." Gintalakay sini ang mga inagihan nga hugna sang pangkabilogan nga krisis sang kapitalismo sa idalom sang imperyalismo-halin una tubtob sa subong nga ika-apat ka hugna sini. Ginsubay sini sa kasaysayan ang porma sang nasambit nga mga krisis nga nagpadulong sa ilabi pa nga pagkaagnas sang kapitalismo kag paglapad sang sosyalista nga rebolusyon sa kalibutan. Ginlaragway sini ang lebel sang kagarukan sang subong nga ika-apat nga hugna sang pangkabilogan nga krisis, nga ginkinaiyahan sang paglala sang pagpamigos kag pagpanghimulos sa sahing mamumugon kag iban pa nga pigos nga sahi sa kalibutan sa idalom sang mga patakaran nga neoliberal.

Nagpadala man sang kontribusyon nga dokumento ang Communist Party of India (Maoist). Kaundan sini kung paa-no luto na ang subong nga kahimtangan sa ekonomya para sa liwat nga pagbangon sang proletaryo nga rebolusyonaryong paghimakas.

Nagsentro ang mga talakayan sa 17 ka ginsumite nga mga panan-awan kag pamulong-pulong sang mga tiglawas sang mga partido komunista, mga kahublagan sang pungsodnon nga paghilway, kag mga pormasyon pangpulitika halin sa Austrilia, Belgium, Canada, India, Italy, Kurdistan, Pilipinas, Turkey, kag US, amo man sang anti-imperyalista nga mga organisasyon nga nagatiglawas sa mga kababainhan, migrante, mamumugon pang-agrikultura, imol nga taga-syudad, kag mga siyentipiko.

85th IB, gin-ambus sang BHB-Quezon

MAKAHAS NGA GINBANTAYAN sang mga Pulang hangaway sang Bagong Hukbong Bayan (BHB)-Quezon (Apolonio Mendoza Command) ang 30-katawo nga yunit sang 85th IB nga naga-operasyon sa Barangay Doña Aurora, Calauag sadtong Marso 25, alas-6 sang gab-e. Tatlo ang nabalita nga napilasan sa mga pasitang suldado.

Base sa paahayag ni Ka Cleo del Mundo, tigpamaba sang BHB-Quezon, ginpalukpan sang hangaway sang banwa sang command detonated explosive ang 85th IB kag nagdugay ang inaway sang 10 minutos. Luwas naman ang yunit sang BHB. Liwat sini nga nahamutig ang deklarasyon sa Quezon isip "insurgency-free" sadtong Hunyo 2023 kag pagpaidalom sa kategorya nga "Stable Internal Peace and Security," sa iya.

Sa Agusan del Sur, ginbalita kasan-o lang sang yunit sang BHB sa prubinsya nga nagtigayon ini sang operasyon haras batuk sa naga-operasyon nga tropa sang 3rd Special Forces Battalion (3rd SFB) sa Barangay Mabuhay, Prosperidad sadtong Enero 19. Duha ka pasista ang napatay sa pag-atake sang mga Pulang hangaway, kabahin ang isa ka upisyal sang mga mer-senaryo.

"Ika-55 nga..." halin sa pahina 3

ang Christians for National Liberation, Katipunan ng mga Gurong Makabayan, Makabayang Samahang Pangkalusugan, Liga ng Agham para sa Bayan, kag Armas sa Quezon City, Pasig City kag Manila City. Nagpagwa man sang pahayag ang Makabayang Kilusan ng Bagong Kababaihan. Ginpanawagan nila ang pagpakigbahin sa taga nila ka sektor sa inaway banwa kag pagpatapo sa BHB.

Samtang, nagtigayon man sang magtililipon kag aktibidad ang mga yunit sang BHB sa tanan nga mga rehiyon nga nagaluntad ini.

Internasyunal nga panamyaw

Nagpalab-ot man sang panamyaw ang pila ka partido kag organisasyon sa iban nga pungsod sa kahiwatan sang anibersaryo sang BHB. Sa pahayag sang Komite Sentral sang Communist Party of India (Maoist), ginpalab-ot sini ang pagsalig sa rebolusyonaryo nga kahublagan sa Pilipinas nga mapanginbabawan sini ang temporaryo nga mga pag-atras kag sablag kag maka-abante pasulong.

Nagpahayag man sang pagkilala sa hangaway sang banwa ang Friends of the Filipino People in Struggle kag Anti-Imperialist Action Ireland (AIAI). Isip ila nga panamyaw, nagpatigayon sang oplan pinta ang AIAI sa Galway, Ireland.

Ginhiwat man sa Amsterdam, the Netherlands ang anibersaryo sang BHB kadungan sang pagtakop sang ginlunsar nga teoritikal nga kumperensya sang NDFP sadtong Marso 28-29. Nagtambong sa pagtililipon ang 98 ka delegado halin sa siyam ka mga pungsod.

Kalbaryo sang Masang Anakbalhas, gintigayon sa Metro Manila kag Southern Tagalog

GINLUNSAR SANG MGA organisasyon sang masang anakbalhas sadtong Marso 26, sa Recto Avenue sa Manila, ang tuigan nga Kalbaryo sang Masang Anakbalhas. Kabahin sa mga hambalanon nga gin-atubang sang mga tumalambong sa Kalbaryo ang nagalala nga krisis sa palangabuhian, reklamasyon sa Manila Bay kag demolisyon sa Navotas kag pagpang-redtag sa mga lider aktibista kag ila mga komunidad. Dala nila ang mga panawagan para sa pagpataas sang sweldo kag pagtapos sa kontraktwalisasyon, pagbungkag sa mga unyon, pagpang-ipit sa mga mamumugon kag malaparan nga disempleyo sa pungsodnon nga sentro.

Ginlunsar man ang Kalbaryo sang Timog Katagalugan sadtong Marso 24. Dala-dala sang mga tumalambong sini ang pagpamatuk sa charter change kag pagsulong sang matuod nga reporma sa duta, makabuhing sweldo, pungsodnon nga soberanya, kag makatarunganon nga kalinong. Pagkasunod adlaw, nagpadulong sila sa pungsodnon nga sentro para iduso ang ila mga hibubun-ot sa mga departamento sang empleyo, edukasyon kag kinaiyahan.

Pagtahod sa internasyunal nga makitawhanon nga laye, maukod nga ginpakigbato

MADASIG NGA NAGPADALA sang mga grupo ang Karapatan-Southern Tagalog kag iban pa nga grupo sa Batangas kag Quezon sadtong nagligad nga semana para siguraduhon nga pagatahuron sang mga armadong pwersa sang reaksyunaryong estado ang internasyunal nga makitawhanon nga laye. Nagbulig sila sa mga masang mangunguma kag nag-alalay sa mga himata sang mga Pulang hangaway sang Bagong Hukbong Bayan sa pagpasiguro sang ila nga mga kinamatarung.

Sa Batangas, ginhirot sang mga grupo kag pamilya ang pagkuha sa mga bangkay sang mga hangaway nga sila ni Junalice Arante-Isita (Ka Arya), Bernardo Bagaas (Ka Mamay/Mike) kag Erickson Cueto (Ka Ricky/Vale) nga napatay sa pag-atake sang 59th IB sadtong Marso 26 sa Barangay Elvita (Tubahan), Rosario, Batangas.

Sa Quezon, nagbulig sila sa pamilya nila ni Divine Sureta (Ka Zoe) kag Paul Cruz (Ka Isko), mga hangaway nga namartir sa engkwentro sa Guiniyangan sadtong Marso 28.

Sa pareho nga higayon, nag-agum sila sang pagpang-ipit halin sa pulis kag militar. Tuman nga gin-atrasang pamilya sa pagkuha sang bangkay sang ila mga himata kag gintublag pati ang mga komunidad nga pagahiwatan sang pulaw.

Amo man, maisog nila nga ginduso ang kinamatarung sang mga pamilya kag nanindugan nga dapat tahuron ang internasyunal nga makitawhanon nga laye.

Isa ka grupo man ang ginpadala nila sa Calauag, Quezon para hibal-on ang kahimtangan ni Randy Roeta, ginbalita sang militar nga nagsungka nga katapo sang BHB sadtong Marso 25. Gusto nila nga sigurohon ang pagtahod sa mga kinamatarung ni Roeta.



Ayuda kag suporta sa mga apektado sang El Niño, ihatag! Nagpiket ang mga grupo sang mangunguma kag mangingisda sa upisina sang National Food Authority (NFA) kag Department of Agriculture (DA) sa Quezon City sadtong Abril 3. Ginsaway nila ang duha ka ahensya sang rehimen Marcos sa kapabaya kag kainutil sini nga hatagan ayuda ang mga mangunguma kag mangingisda nga tuman nga apektado sang mga kahalitan sang El Niño.

Kumpanya nga Boskalis, ginpasabat sa halit sa Manila Bay. Nagprotesta sa atubang sang embahada sang The Netherlands sa Manila sadtong Marso 22 ang mga grupo nga maki-kinaiyahan, syentista, mangingisda kag mga residente sa mga baybayon sang Manila Bay para sukton ang Boskalis Westminster NV, isa ka kumpanya nga Dutch, sa gintuga sini nga kahalitan tungod sa *dredging* para sa proyekto nga reklamasyon sadtong 2021-2023. Ang *dredging* nga ini ang pagpangaman para sa pagtukod sang proyekto sang San Miguel Corporation nga New Manila International Airport sa Bulacan. Isa ka pareho nga protesta ang ginlunsar naman sa Parendrect, The Netherlands, kung sa diin yara ang nagapanguna nga upisina sang Boskalis.

Mga estudyante sang UST, naghiliugyon kontra pagpamigos sa kampus. Naglunsar sang hublag-protesta ang mga estudyante sang University of Sto. Tomas (UST) sa atubang sang kampus sini sa Manila sadtong Marso 22 para kundehon ang mapiguson nga mga patakaran sa unibersidad. Kasunod ang ululupod nga hublag sang pagpahayag sang pag-isa sang mga konseho sang tumuluon, mga pamantalaan, kag iban pa nga organisasyon sa kampus sadtong Marso 20 batuk sa administrasyon sang UST. Ginpangunahan ang mga aktibidad sang Rise for Education Alliance-España.

Dumuluong nga pagpanag-iyang sa mga eskwelahan kag taas-matrikula, ginsaway. Nagprotesta ang mga pamatan-on nga estudyante sa atubang sang Commission on Higher Education (CHED) sa Quezon City sadtong Marso 22 para sawayon ang pagtib-ong sang rehimen US-Marcos sa charter change nga magatugot sa 100% nga pagpanag-iyang sang dumuluong sa mga buluthuan sa pungsod. Ginkundenar man nila ang nagahana nga pagtaas sang matrikula sa mga pribado nga unibersidad nga base sa ila sigurado nga paga-aprubahan sang CHED isip "rubber stamp" sang mga eskwelahan nga ini.

Serye sang kaksanay sa Nexperia, ginapakigbatuan. Nagprotesta sadtong Marso 22 sa sulod sang Laguna Industrial Science Park sa Cabuyao, Laguna ang mga mamumugon sang Nexperia Philippines, upod ang ila nga mga tigsuporta, para pamatukan ang natalana nga pagkakas sang 54 ka mamumugon sa Abril. Ang kaksanay nga ini ang ikaduha na sa sulod sang walo ka bulan. Sayod sila nga katuyuan sang serye sang mga kaksanay ang bungkagon ang unyon nga nag-angkon na sang mga kadalagan sa ululupod nga hublag sang mga mamumugon sa nagliglad.

Pagsugod sang kahublagan panadlong sa Agusan kag Surigao del Sur

Sunod-sunod nga pagtuon kag talakayan ang madinalag-on nga ginlunsar sang Bagong Hukbong Bayan (BHB) sa mga prubinsya sang Agusan kag Surigao del Sur sa una nga kwarto sang 2024. Bunga sang nagadilaab nga pagbaton sang komite kag mga katapo sang Partido sa panawagan sang Komite Sentral nga ilunsar ang kahublagan panadlong sa mga hilikuton sa ideolohiya, ginatinguhaan kag determinado nga ginlunsar sang BHB diri ang mga pagtuon kag talakayan sa tunga sang sustenido nga operasyon sang kaaway.

Ginsuguran nila ini sa pagtuon sa pahayag sang Partido sa ika-55 nga anibersaryo kung sa diin tatlo ka grupo ang nakatapos sa istagard nga pagtuon. Ang una nga grupo ang ginpangunahan kag gintambungan sang mga katapo sang komite nga seksyon kag larangan gerilya. Kalabanan sa mga nagtambong ang mga lamharon nga kadre nga nagbug-os sa 74% kag 26% naman ang edaran nga mga kadre. Nagdugay ang kabilogan nga pagtuon sang 18 ka oras kag 30 minutos. Basa-talakay kag chalk talk ang nangin pamaagi sa pagtalakay sang mga kaupod. Sa kolektibo nga diskusyon, nangin buhi ang talakayan sang mga kaupod tungod sa pagbahin sang ila mga inagihan sa pagpukaw, pag-organisa kag pagpahulag sa masa kag kung paano ginpamunuan ang pagsulong sang inaway banwa sa prubinsya kadungan sang mapainubuson nga pagtuki kag pagbaton sa mga partikular nga kahuyangan kag kakulangan nga nagresulta sa pila ka mga kapaslawan sa pag-atubang sa atake sang kaaway.

Samtang, ginsuguran sang mga

kaupod ang ikaduha nga grupo sang pagtuon nga ginbug-os sang tanan nga katapo sang Partido sa sulod sang hukbo halin sa mga kandidato kag lubos nga katapo (40% kag 60%). Nagserbe nga instruktur nila ang mga kaupod nga una na nakatapos. Gintinguhaan nga mapamag-an ang daloy sang talakayan sa paghimo sang mga simple nga biswal pareho sang drawing sa mapa sang kalibutan agud mas madali nga ilaragway sa mga tumuluon ang mga imperyalista nga pungsod kag kung diin ini nagalunsar subong sang proxy war, napakita man sa mga kaupod ang platar sang mga atrasado nga pungsod ukon kolonya kag semikolonya nga nagasulong sang armado nga paghimakas. Sa pihak nga basa-talakay sa gihapon ang pamaagi, nahimo nga palip-uton gamay ang kabilogan nga kalawigon sang pagtuon. Sa ikatatlo nga bats, makahas nga ginbaton sang pila sa mga kaupod nga may potensyal sa pagtudlo ang katungdanan nga maghanas nga magserbe nga instruktur para sa ulihi nga grupo nga ginbug-os sang mga Pulang hangaway

nga indi pa katapo sang Partido.

Base sa mga kaupod, dako ang nabulig sa ila sang pagtuon sa pahayag sang Partido. Nakahatag ini sang panibag-o nga kusog kag dugang nga kabakod para mas papag-unon ang kabubut-on nga magbato kag magpa-dayon sa armdo nga paghimakas.

"Mas nangin kongkreto sa ila ang pagka-giya sang Partido agud mas mahangpan ang madasig nga pagbag-o sang kahimtangan," sandig kay Kaupod Del, isa sa mga tumuluon. Nagserbe nga iwag man ini sa mga kaupod nga nagahuyang ang kabubut-on kag gintuytuyan man sila nga magbangon halin sa pagkadagma sa mga negatibo nga paminsaron. Isa diri si Ka Maja, isa ka iloy nga panalagsa na nga naanon sa kahidlaw sa iya nga bata.

Nangin hangkat naman kay Ka Che nga ilabi magpakabakod kag atubangon ang mga pagsulay sa pagtungod sa komprehensibo nga hilikuton. "Nabatyagan ko ang kakinahanglan nga dobleng magtinguha agud magsulong kag magbakod isip katapo sang Partido," sa iya.

Ang nagsunod nga mga talakayan ang kabahin sang pagtuon sa mga topiko sa Padepa (Pambansang Demokratikong Paaralan) agud balik tun-an kag hangpon ang mga partikular nga katungdanan halin sa lebel komite sang Partido, sa bug-os nga katapuan sini, tubtob sa hilikuton sa platun kag mga katimbang sini. Ang mga pagtuon ang pagpangandam man sa plano nga paglunsar sang Batayang Kurso ng Partido.

Sa kabilogan, malipayon kag matutom ang mga kaupod sa pag-atubang sa mga hangkat kag nalab-ot ang katuyuan nga sugdan ang kahublagan panadlong, magkonsolida, tumuron ang tagsa ka partikularidad kung sa diin nagkulang kag nagsayop kag determinado nga panginbabawan ang mga kahuyangan agud mas ilabi pa nga magsulong sa masunod nga mga panahon.

AB




29% 

ang gindako sang gintingob nga manggad sang tatlo (Manny Villar, Enrique Razon, Ramon Ang) pinakadalagko nga komprador-burgesya sa Pilipinas sa nagligad nga tuig, halin ₱1.1 trilyon padulong ₱1.4 trilyon sadtong Marso.

Samtang, nagtaas lang sang 7% ang abereyds nga minimum nga sweldo sang mga mamumugon halin ₱409 padulong ₱439 sa pareho nga higayon.

\$700 M 

ayuda militar nga ginbubo sang US sa Taiwan para itulod ang pagbulag sini sa China kag gamiton ang pumuluyo sang isla sa pakig-away sini sa China.



27 na ka lapsag kag bata ang napatay sa gutom sa Gaza.



139



ka empleyado sang **National Food Authority** ang "indi makatarunganon kag wala basehan" nga ginsuspinde sa alegasyon nga may kahilabtanang sila sa "sindikato" sa sulod sang ahensya.

Ginduso sang COURAGE nga hinanali sila nga ibalik sa trabaho.

April 1, 2016

nahitabo ang Kidapawan Masaker, kung sa diin ginpangtiro sang mga pulis ang mga nagarali nga mangunguma sa Kidapawan City, North Cotabato para sa nagaka-angay nga suporta halin sa estado sa tunga sang grabe nga tig-ilinit nga tuga sang El Niño.

Tatlo ang napatay kag masobra 100 ang napilasan sa masaker nga ini.

₱164.7B

depisit sa badyet sang Pilipinas sa una nga kwarto sang 2024, 55% mas dako kaysa ₱106.4 bilyon nga depisit sa una nga kwarto sang 2023.

46

ka beses na nga ginagamit sang US halin 1972 ang boto sini sa Security Council sang United Nations para pangapinan ang mga agresyon militar kag pagpanakop sang Israel sa mga teritoryo sang Palestine.

Tatlo ang gingamit sini lang nagligad nga lima ka bulan para padugayon kag pabaskugon ang gyerang henosidyo batuk sa mga Palestino sa Gaza.

Praymer

Kahalitan sang El Niño:
Tig-ilinit, pagpabaya kag pasismo sang rehimen Marcos

Marso 2024



I-download ang inyo nga kopya sa:
<https://philippinerevolution.nu/>

Pagpamomba, pagpatay kag kapintas sang AFP sa nagligad nga semana

Naghatag sang kahadlok sa mga residente ang ginlunsar nga aerial bombing sang Armed Forces of the Philippines (AFP) sa mga komunidad sa dulunan sang Sta. Maria, Ilocos Sur kag Pilar, Abra sadtong Abril 2 sang udto. Indi magnubo sa 212 ka pamilya ang nagbakwit tungod sa mga pagpamomba kag pagpang-ipit sa ila nga palangabuhian. Magluwas diri, ginatos ka tropa militar man ang ginbubo sa lugar para sa operasyon kontra-insurhensya.

Ang paggamit sang baskog nga mga bomba ang "duna nga indiscriminate" ukon wala sang may ginapili, nagabutang sa katalagman sa kabuhi kag palangabuhian sang mga sibilyan kag nagatuga sang malapad nga pagkawasak sa kinaiyahan. Sa kamatuoran, lapaw sa ground zero ang epekto sang pagpamomba sang AFP halin sa kahawaan, kabaliskaran sa ginawakal sang 501st IBde nga pagpamomba ang nakati-on lang sang isa ka yunit sang Bagong Hukbong Bayan (BHB)-Abra.

Pagpatay. Gintiro tubtob ma-

patay sang 62nd IB kag mga pulis ang sibilyan nga mangunguma nga si Marlon Catacio sa Sityo Angalan, Barangay Quintin Remo, Moises Padilla, Negros Occidental sadtong Abril 4. Agud nga palagyuhan ang salabton, ginpagwa sang militar nga Pulang hangaway si Catacio nga napatay sa isa ka engkwentro. Gilayon ini nga ginpanginwala sang mismo iloy sang biktima.

Pag-aresto. Gindakop sang 62nd IB si Ronald Cantela sa Sityo Pitik-pitik, Barangay Luz, Guihulngan City sadtong Marso 20. Ginpagwa sang mga suldado nga na-

kumpiskar sa iya nga balay ang isa ka pistola. Ginbungkag man sang mga suldado ang kagamitan sang pamilya samtang nagapangukay.

Pagpang-abuso. Ginhikap kag ginbastos sang isa ka hubog nga elemento sang 59th IB ang isa ka dalagita sa Sityo Sales, Barangay Pook, Balayan, Batangas sadtong Marso 28. Magluwas diri, wala sang rason man nga ginkastigo sang suldado ang 14-anyos nga lalaki nga upod sang dalagita.

Pagpang-ipit. Ginpahog kag ginharas sang gintingob nga mga pwersa sang pulis, militar kag upisyal sang barangay ang tim sang mga boluntir nga nagpatigayon sang imbestigasyon bahin sa epekto sang El Niño sa mga mangunguma kag residente sang Barangay Sampaga, Balayan, Batangas kaagahon sang Marso 24. AB

Paglutaw sa 2 ka gin-abdak nga aktibista sa Pangasinan, tuga sang madasig kag matutom nga pagduso

Sa sulod sang tatlo ka adlaw, naduso sang mga himata, abyan kag mga kasubong nga aktibista ang mga pwersa sang estado kag ang rehimen Marcos nga ilutaw sila ni Francisco "Eco" Dangla III kag Joxelle "Jak" Tiong. Gin-abdak ang duha sadtong alas-8 sang gab-e sang Marso 24 sa Barangay Polo, San Carlos City, Pangasinan. Gin-anunsyo sang mga grupo sa tawhanon nga kinamatarung nga "wala na sa kamot sang mga nag-abdak sa ila ang duha, puno sang kastigo, pero buhi" sadtong Marso 27.

Sa pahayag sang mga nakasaksi, gin-abdak ang duha pagkatapos bala-bagan sang isa ka SUV ang traysikol nga ginasakan nila. Duwa tubtob tatlo ka tawo halin sa SUV kag isa pa ka nakasakay sa isa ka motor ang nagkastigo kag nagsakay sa ila sa salakyan, hambal nila. Nabatian pa nila ang pagpangayo ni Tiong sang bulig.

Si Dangla, 39, ang anay estudyante sang University of the Philippines kag nagatindog nga tigpamaba sang Bagong Alyansang Makabayan (Bayan)-Pangasinan. Samtang si Tiong, 29, gradweyt sang Universidad de Dagupan ang koordineytor sang Kabataan Partylist sa prubinsya. Pa-

reho sila nga tigtipon sang Pangasinan People's Strike for the Environment, grupo nga nagapanindugan batuk sa plano nga black sand mining kag pagtukod sang nuclear power plant sa prubinsya. Bag-o ang insidente, biktima na ang duha sang wala untat nga Red-tagging, pagpaniid, intimidasyon kag iban pa nga porma sang pagpang-ipit sang armado nga pwersa sang estado.

Dako ang nangin bulig sang malaparan nga pagpangita kag pagtuga sang gahod para mapalutaw ang mga biktima. Gilayon nga nabalita ang panghitabo sang pag-abdak sa ila, napaskil sa social media, nakapagwa

sang mga pahayag kag nag-ani sang suporta halin sa mga grupo nga makinaiyahan kag iban pa. Nabalita man ini gilayon sa telebisyon.

Nagprotesta man gilayon ang mga tigpangapin sang tawhanon nga kinamatarung sadtong Marso 25 sa Quezon City para kundenaron ang pag-abdak sang mga ahente sang AFP kag PNP sa duha. Nagtukod man sang tim para kadtuan ang mga kampo militar kag istasyon sang pulis sa ginkahamtangan sang mga biktima.

Kabahin sang kampanya ang pagkadto sang mga himata nila ni Dangla kag Tiong, upod sa Kabataan Representative Raoul Manuel, mga tawong simbahan kag iban pa nga mga grupo sa Camp Lt. Tito Abat, Barangay Calaoacan, Manaoag, Pangasinan, kampo sang 702nd IBde, 7th ID. Nangusisa sila sa kampo kag nagpasaka sang "inquiry" kaangot sang report sa pilit nga pagkadula nila Dangla kag Tiong. AB

“Kwarantina” militar, bilangguan sang “nagsungka” nga mga sibilyan sa Surigao Del Sur

Halin sang ginsulong sang mga yunit sang 3rd SFB kag 75th IB ang Surigao Del Sur sadtong 2020, nagdamo ang nakaangkon sa kapintas sang militarisasyon kag nabiktima sa peke nga pagpasungka sa Armed Forces of the Philippines (AFP). Kalabanan sa ila mga lumad.

Sa tabon sang Retooled Community Support Program (RCSP) kag Enhanced Community Livelihood and Integration Program (E-CLIP), nagpangbalay-balay ang mga suldado kag pulis bitbit ang listahan sa mga target nila sa kampanyang pagpasungka. Bisan pa wala sila ginpasa-kaan kaso, ang mga yara sa listahan ginapilit nga magsungka kag magpabilanggo sa kampo agud “magp-clear ukon limpyo” ang ila mga pangalan. Ginpasaligan sila nga hilwayon sulod sa tatlo tubtub anum ka bulan matapos malimpyo ang ila pangalan. Ang mga indi magsungka ang ginapaandaman nga pasakaan sa nagkalain-lain nga kaso. Bangud sa kahadlok, pila ang napilitan nga magsungka kag ipaidalom sa kwarrantina samtang kuno ginaproseso ang himo-himo nga mga kaso batok sa ila.

Sa aktwal, ang pagkawkwartina, amo ang iligal nga pagdakop kag de-

tensyon sa mga indibidwal nga may kaangtanan sa armado nga kahublagan sa arbitraryo kag wala sang basehan nga ginakabig sang estado bilang terorista. Ginapagwa nga boluntaryo ang ila nga pagsungka bangud wala sang naka-isyu nga mandamyento de aresto batok sa ila. Madamuan sa ila ang wala ginpaatubang sa husgado, wala sang legal nga representasyon kag ginadingutan sa iban nga kinamatarong. Lapas ang amo nga pagpangdakop kag pagbilanggo sa basihan nga mga kinamatarong sibil, kag mangin sa internasyunal nga makitawhanon nga laye.

Sa pihak nga bahin, ang mga peke nga pagpasungka, iligal kag likom nga pagpangdakop kag detensyon amo ang pagpraktika sang pasista nga Anti-Terror Law. Ginapahatnugutan sang laye nga ini ang arbitraryo nga paglista sa sin-o man nga isip sang terorista kag ang pagdakop kag pagbilanggo sa ila nga lapaw 24-o-

ras nga wala sang maathag nga kaso.

Bulugasan sang militar

Dako ang palas-anon ang iske-ma nga ini sa mga mangunguma nga biktima bangud kinahanglanon nila ang magpyansa sa mga himo-himo nga kaso. Kadam-an sa ila ang napilitan magbaligya sang ila mga duta kag mangutang sa mas mataas nga interes para magsupot sa pyansa halin sa kinaandan ₱30,000 tubtub ₱120,000.

Bisan nakabayad na sila sang pyansa, wala pa gid natapos ang ila kalbaryo. Dugang paantus sa ila ang pagpamilit sang militar nga luiban nila ang ila mga kaupod kag lider, panilagan ang mga ginaspetsuhan nga may kaangtanan sa BHB, kag ipabalo kung may Makita sila nga mga palatandaan ukon kuta sang BHB.

Ang iban nga biktima nga ginpasa-kaan sang himo-himo nga kasong kriminal kasubong sa pagpatay kag paslaw nga pagpatay amo ang ginasyalo sa provincial ukon city jail, kung sa diin wala sang kasiguraduhan nga sila makahilway.

Ginahimo man nga bulugasan sang mga opisyal sang AFP kag PNP ang nakatalana nga ayudang pangpinansya para sa mga nagsungka sa idalom sang E-CLIP. Wala bisan isa ka sentimo sila nga nabaton halin sa programa nga ini. Mas madamo sang ginpangbilanggo ang mga suldado nga mangunguma, mas madamo sila nga mabulsa. Katuyuan sang iligal nga mga pagpangdakop kag detensyon agud pahuyangon ang hugot nga paghiliusa sang pumuluyo sa Surigao Del Sur kag tapuson ang ila tatlo ka dekada nga pagpamatuk kag pagbato sa pagsulod sang mga logging concession kag dumuluong kumpanya sa pagmina nga malawig na nga nagalaway sa dunang manggad nga sakop sa ila mga duta nga panublion.



Protesta sang mangunguma batok sa liberalisasyon, liwat nga nagbuylo sa India

Sadtong Marso, ginabuyok sang Communist Party of India-Maoist (CPI)-Maoist ang linibo ka mangunguma para ipadayon ang ila protesta tubtub indi nila maangkon ang ila ginahingyo. Halin sa tunga-tunga sang Pebrero, padayon ang mga pangmasang paghulag nga gintambungan sang 30,000-50,000 mangunguma agud iduso ang makatarunganon nga presyo sang baklanay sa ila nga produkto kag pagpatuman sa mga pasalig sang nagahari nga partidong Bharatiya Janata Party (BJP) sa nagligad duha ka tuig.

Sakay sa ila mga traktora, tuyo sang mga mangunguma nga dal-on sa Delhi, kapital sang India, ang ila nga protesta ginharang kag ginbungkag sila sa Shambu, isa ka banwa 200 kilometro ang kalayuon sa kapital. Halin Pebrero 13, pasulit-sulit nga ginbungkag sang mga suldado kag pulis ang ila protesta paagi sa paghulog sang teargas nga bomba gamit ang mga drone kag pagluthang gamit ang matuod nga bala kag rubber bullets. Indi magnubo sa duha ka raliyista ang napatay kag ginatos ang napilasan. May ara sang mga nagkalabungol kag nagkalabulag bangud sa pagpang-atake. Kalaban sa mga nag-upod sa protesta naghaling sa estado sang Punjab kag Haryana.

Sadtong Marso 14, nagpadulong sa Delhi ang 5,000 sa ila sa pagpanguna sang Samyukt Kisan Morcha (Indi Pulitikal) kag Kisan Mazdoor Morcha. Tiglawas sini ang indi magnubo sa 40 ka unyon sa kaumahan ang nag-upod sa protesta para sa pakigdayalogo sa gubyernong Indian.

Ang panigbag-o nga bugso sang paghulag amo kasugpon sa masobra isa ka tuig nga protesta kag pagkampo sang mga mangunguma sadtong 2020-2021 nga nagpaatras sa tatlo ka laye sa tuyo nga ipaidalom ang sektor sang agrikultura sa mga patakaran liberal. Isa sa mga pasalig sadto si Narendra Modi, punong ministro sang India, ang pagdoble sang kita sang mga manunguma antis matapos ang iya termino sa 2025.

Duha ka tuig matapos ang mga pangako, nanunga ang kita sang mga mangunguma. Mas nagalala, tuyo sang rehimeng Modi nga ilusot ang liberalisasyon sa baligyaanay kag pribatisasyon sa mga serbisyo sa agrikultura nga wala ginpaagi sa parlamento.

Sa subong nga paghulag, ginaduso sang mga mangunguma nga pabakuron sang estado ang minimum price support (MSP) ukon presyo sa pagbakal sang estado sa mga produkto batok sa pagpangbarat sa mga komersyante kag gulpi nga mga paglusno sang presyo sa merkado. Suno sa ila, dapat italana

ang MSP sa 50% sa mas mataas sa gasto nila sa produksyon, para masiguro nga mabuhi nila ang ila pamilya. Panawagan nila nga sakupon sini ang tanan nga mga pananom, kag indi lang sa 23 ka pananom pareho sa ginapatuman sang BJP.

Kaangut sini, ginapanawagan nila ang pagbasura sa mga kasugtanan nga ginsudlan sang India sa World Trade Organization kag indi pagsulod sa anuman nga kasugtanan para sa anomaliya nga baligyaanay. Ginakundenar nila ang pagduso sang gamhanan nga bloke sang WTO para sa pagbabasura sa sistemang MSP bilang isa ka porma sang subidyos. Ginpamatukan man nila ang pagduso sang WTO para sa pagkakas sang subidyos sa abono, pestisidyos, binhi, kuryente kag iban pang serbisyo nga lubha nga kakinahanglanon sang mga mangunguma.

Ginagiit sa mga mangunguma ang pagkakas sa ila mga utang, napadaog nila sa mga paghulag sadtong 2020-2021. Ginapanawagan man nila ang hustistya para sa 750 mangunguma nga nagkalamatay tuga sa pagpangharas sang estado sa mga paghulag sini.

Ang paghimakas sang mga mangunguma indi hamulag sa paghimakas sang iban pa nga sektor sang sosyedad Indiano, partikular sa paghimakas sang mga Adivasi (pungsudnon nga minorya), suno sa CPI-Maoist. Pareho ang katuyuan sang mga paghimakas sini nga hilwayon ang manggad kag hilaw nga rekursos sang pungsod. Kun amo, dapat suportahan ini sa tanan nga demokratikong sektor sang sosyedad Indiano, kasubong sang pagsuporta nila sa mga protesta sadtong 2020-2021. Yara sa 40%-60% sa 1.4 bilyon pumuluyong Indiano naka-sandig sa agrikultura. Sobra katunga sa ila ang wala kaugalingon nga duta, kag ang iban magagmay nga mangunguma.

